

3. KUMPULAN SASAR DAN SKOP LIPUTAN

Terdapat beberapa agensi yang telah ditugaskan untuk mengawal dan membuat pemeriksaan di pintu sempadan negara seperti Jabatan Imigresen Malaysia (JIM), Polis Diraja Malaysia (PDRM), Angkatan Tentera Malaysia (ATM), Agensi Penguatkuasa Maritim Malaysia (APMM) dan sebagainya. Selain itu, *Genuine Inspection Device* (GID) ini juga dapat digunakan bukan sahaja di pintu-pintu sempadan negara sahaja bahkan dapat digunakan di Jabatan Pendaftaran Negara (JPN), agensi pengurup wang berlesen, kedai-kedai runcit yang melibatkan urusan wang tunai dan sebagainya.

3.1 Pegawai Imigresen

Salah satu tugas seorang pegawai imigresen adalah memeriksa dengan teliti dokumen perjalanan yang diterima daripada pelawat. Terdapat 3 cara masuk pelawat ke negara Malaysia iaitu melalui pintu masuk yang diwartakan iaitu udara, darat dan laut. Di mana jumlah pintu masuk yang diwartakan adalah sebanyak 138 buah pintu masuk laut, darat dan udara. Dalam mengawalselia pergerakan keluar masuk pelawat di pintu-pintu masuk ini kecekapan dan ketelitian amatlah dititikberatkan bagi memastikan keselamatan negara tidak terancam.

Di seluruh Malaysia sahaja, Jabatan Imigresen Malaysia mempunyai anggaran 14 ribu pegawai dan ia merupakan satu cabaran bagi Jabatan Imigresen Malaysia meningkatkan keupayaan para pegawainya seiring dengan ekspektasi rakyat atau pelanggan. Bukan sahaja para pegawai di Jabatan Imigresen Malaysia perlu dilengkapi dengan kemahiran, ia perlu juga disertakan dengan bantuan teknologi bagi menyaingi sindiket-sindiket pemalsuan dokumen yang semakin canggih teknologi pemalsuannya.

Di samping itu, kepelbagaian ciri keselamatan yang terdapat pada sesebuah dokumen perjalanan termasuk passport, visa, pas dan permit memerlukan pegawai untuk menggunakan sebuah alat pemeriksaan yang praktikal dan dilengkapi dengan pelbagai fungsi yang dapat mengesan ketulenan sesebuah dokumen tersebut.

3.2 Pegawai polis

Tugas seorang pegawai polis juga mencakupi hal-hal pemeriksaan dokumen keselamatan seperti kad pengenalan, passport dan sebagainya. Dokumen-dokumen keselamatan yang dilengkapi dengan pelbagai ciri keselamatan tersebut memerlukan para pegawai menggunakan sebuah alat yang dapat membantu proses pengesanan ketulenan serta dapat memeriksa dokumen keselamatan dengan lebih teliti.

Pihak Polis Diraja Malaysia (PDRM) dan Jabatan Imigresen Malaysia sentiasa bekerjasama secara rapat dalam hal-hal seperti penguatkuasaan. Kerjasama seperti di dalam OPS bersepadu di dalam melaksanakan operasi dan tangkapan Pendatang Tanpa Izin (PATI) di seluruh negara dapat membantu dalam membanteras jenayah rentas sempadan secara lebih berkesan. Perkongsian maklumat antara PDRM dan JIM

juga membantu kedua-dua belah pihak dari segi aspek pengurusan dan pemantuan isu-isu keselamatan negara.

Alat pemeriksaan ketulenan *Genuine Inspection Device*(GID) yang direkabentuk oleh kumpulan Kikers adalah bersifat kecil dan ringan ini boleh dibawa ke mana-mana lokasi operasi yang dijalankan oleh PDRM. Ini akan dapat memudahkan para pegawai polis menjalankan tugas dengan lebih teliti dan tentunya ia memberi manfaat yang besar kepada 117,929 anggota polis di seluruh negara.

3.3 Penguatkuasa Maritim

Penguatkuasa maritim yang bertugas untuk menjaga keselamatan di kawasan perairan negara juga turut memerlukan seseorang penguatkuasa maritim itu membuat pemeriksaan dokumen perjalanan yang dibawa oleh mana-mana orang yang berada di kawasan perairan negara. Ini bagi memastikan setiap orang yang berada di dalam kawasan negara mempunyai dokumen perjalanan yang tulen dan menduduki Malaysia secara sah.

Pemeriksaan dokumen keselamatan yang dibawa oleh orang yang berada di kawasan perairan negara memerlukan 4,500 anggota penguatkuasa maritim dilengkapi dengan sebuah alat yang sangat praktikal. Keistimewaan *Genuine Inspection Device*(GID) ialah bersifat minimal di mana ia bersaiz kecil, ringan, boleh dicas semula dan tanpa memerlukan telefon pintar. Justeru, dapat membantu tugas pemeriksaan dokumen perjalanan semasa berada di perairan negara dengan lebih mudah dan teliti.

3.4 Peniaga dan penjaja kecil, agensi penguatkuasa dan pengurup wang

Terdapat seramai 1.5 juta peniaga dan penjaja kecil di seluruh Malaysia. Walaupun mereka ini tidak memeriksa dokumen keselamatan seperti pasport namun mereka berurusan dengan menggunakan wang kertas dalam urusan niaga seharian. Wang kertas ini juga dilengkapi dengan ciri-ciri keselamatan sepertimana terdapat dalam sesebuah dokumen perjalanan. Jadi, dengan menggunakan alat bantuan GID ini dapat mengurangkan risiko mereka terdedah kepada pemalsuan wang kertas semasa transaksi jual-beli.

Begitu juga halnya dengan agensi-agensi penguatkuasaan yang lain seperti Jabatan Pengangkutan Jalan(JPJ), Kastam Di Raja Malaysia, Jabatan Pendaftaran Negara(JPN), Ikatan Relawan Rakyat Malaysia(RELA), Jabatan Kemajuan Islam(JAKIM), agensi pengurup wang dan sebagainya. Kesemua ini berdepan dengan pemeriksaan dokumen keselamatan seperti kad, wang kertas atau sebagainya. Jadi, penggunaan alat bantuan seperti ini merupakan suatu yang kritikal.

3.5 Skop Liputan

Dengan penggunaan GID ini, ia dapat digunakan di mana-mana. Kumpulan hanya memfokuskan kepada skop liputan yang lebih kecil untuk memudahkan kajian/ujicuba dijalankan. Lokasi yang dipilih adalah di kaunter Bas Masuk Pelancong, Kompleks Sultan Abu Bakar(KSAB).

Sebanyak 200 soal selidik diagihkan kepada pegawai-pegawai imigresen di KSAB. 91% peratus dapat dipungut semula iaitu sebanyak 182 orang pegawai. Pegawai-pegawai imigresen yang menjadi responden dipilih secara rawak dari pelbagai gred dan mengikut tahun pengalaman berkhidmat. Selepas itu, dalam fasa *testing*, 17 orang pegawai terlibat dalam memberikan maklumbalas tentang alat GID. Maklumbalas mereka diterima untuk dijadikan penambahbaikan pada alat GID.